

Consens a favur dad in product da print surregional

Represchentanza rumantscha e dal chantun ha discutà a Berna l'avegnir da la pressa rumantscha

DAD ANDREAS CADONAU / ANR

■ **La soluziun davart las medias rumantschas, principalmain quellas da print, ston la Rumantschia ed il chantun Grischun chattar e definir sez. La confederaziun desista da pretensiuns detagliadas. Quai communitgescha l'Uffizi federal da cultura suenter la scuntrada cun represchentanants dal chantun Grischun, da la Lia Rumantscha, da l'Agentura da novitads rumantscha e da Radio e Televisiun Rumantscha dal glindesdi passà a Berna.** Sur da l'avegnir da la pressa rumantscha giascha anc ina grossa cuverta da tschajera, e quella cuverta nun è sa schliada grondamain suenter la scuntrada da la delegaziun grischuna cun la scheffa da l'Uffizi federal da cultura, *Isabelle Chassot*, il glindesdi passà. Il post da comunicaziun da l'Uffizi federal da cultura ha laschà savair sin dumonda ch'i na saja betg stà l'intenziun da la scuntrada da discutir dumondas e propostas da detagl pertutgant l'avegnir da la pressa rumantscha. La finamira saja stada da laschar infurmar l'Uffizi federal da cultura davart il stan da la lavur. Vinavant scriva l'Uffizi federal da cultura che tut ils participants a la scuntrada sajan stads da principi da l'opiniun ch'i basegnia vinavant ina gasetta rumantscha surregionala da print. Quel consens da principi per ina ediziun da print surregionala para tuttina dad esser in novum en il chapitel avegnir pressa rumantscha. L'uffizi federal scriva bain che la soluziun per la pressa ruman-



Ha discutà soluziuns futuras per la pressa rumantscha cun represchentanants da chantun, Lia Rumantscha, RTR ed anr, la directura da l'Uffizi federal da cultura, Isabelle Chassot.

MAD

tscha stoppia vegnir definida e chattada entaifer la cuminanza rumantscha ed il chantun Grischun. La confederaziun desistia dad inditgar la direcziun da marschar, ella vegnia a prender per enconu-

schientscha las propostas concretas cu ellas sajan sin maisa. La decisiun davart il sustegn finanziel futur crodia sin fundament da las soluziuns preschentanadas, scriva l'Uffizi federal da cultura.

In zichel musica da marsch

In zichel musica da marsch fa l'Uffizi federal da cultura alura tuttina anc en sia comunicaziun e definescha intgins puncts centrals or da vista da la confederaziun. Uschia pon ins intervegnir che la confederaziun saja pertscherta da la necessitad dad in product da print rumantsch che cumparia pliras giadas l'emna, dentant betg exnum mintga di. La varietad mediala rumantscha duai esser garantida entras ina agentura da novitads francada vast e cun in timun publicistic. Dublettas tranter ils divers purschiders da novitads duajan vegnir evitadas. L'uffizi federal definescha quella explicaziun in pau pli exact. Ina purschida rumantscha online sper quella dad RTR na basegnia betg. Vinavant pretenda la confederaziun ch'ils meds finansials vegnian impundids a moda efficienta ed en emprima lingia per cuntegns. E la soluziun futura duai contribuir alla derasaziun da la cultura e lingua rumantscha ordaifer ses origin da tschep. Sin fundament da quellas indicaziuns è la tschajera almain in zichelet schliada, soluziuns concretas anc lunsch davent e l'incumbensa al chantun e la Rumantschia da definir la soluziun futura è, per experientscha en auters secturs, pauc encuraschanta.

Truschar en il funs da la coppina

Ulteriuras explicaziuns dals participants da la scuntrada a Berna nun èn stadas re-

tschaviblas, il fil da la comunicaziun giaschia tar l'Uffizi federal da cultura, hai già num. Uschia ch'ins è sfurzà da truschar in pau en il funs da la scadiola da café. E quel funs ha fatg suandantas explicaziuns: Ils dretgs d'editur dals trais products da print rumantschs giaschan tar ils publicatur. La Quotidiana tar Samedia, La «Posta Ladina» tar l'«Engadinerpost» e «La Pagina da Surmeir» tar l'Uniun rumantscha da Surmeir. Els decidan autonom tge che succeda cun lur products. Tuts trais èn dentant dependents da la furnida da texts da l'Agentura da novitads rumantscha per pudair publicitar. E tuts trais products perdan lecturs ed inserents. Sco ch'i tuna tar Samedia vul la chasa editura bain publicitar vinavant LQ, vul dentant per motifs finansials sa destgargiar dal rest da la redacziun (scheffredactur e correctorat). La dumonda cardinala en il giuè dals giuè para quella tgi che surpiglia la responsabladad redacziunala per LQ. L'anr na dastga para betg, tenor la confederaziun che pretenda che l'Agentura da novitads rumantscha sa concentreschia sin cuntegns. RTR na vul betg, sco la directura *Ladina Heimgartner* è già s'exprimida pli baud. La «Engadinerpost» strusch e l'Uniun rumantscha da Surmeir pli probabel er betg. Interessents per surpigliar la responsabladad redacziunala da LQ dastgan pia s'annunziar libramain. Tar tgi? Il funs da la scadiola da café na porscha deplorablamain nagina resposta, la nebla resta.